

خيوط الشمس

شعر

ميرفت هلال



الكتاب: خيوط الشمس

المؤلف: ميرفت هلال

تصميم الغلاف: أحمد عبد السميع

رقم الإيداع: ٢٠٢١/٠٩٨٦٧

التقديم الدولي: ٨-٥٣-٦٧٨٠-٩٧٧-٩٨٧

الآراء الواردة في هذا الكتاب
لا تعبر بالضرورة عن
دار الفراغة للنشر والتوزيع والترجمة

لا يُسمح بإعادة طبع أو نشر هذا الكتاب أو
جزء منه بأي شكل من الأشكال أو حفظه أو
نسخه في أي نظام إلكتروني أو ترجمته إلى
أية لغة دون الحصول على إذن خطي مسبق
من الناشر وإلا تعرض فاعله للمساءلة
القانونية.

الناشر



رئيس مجلس الإدارة
إكرام عيد

المدير العام
أحمد عبد السميع

لإدارة:

واتس:

٠١٠٠٩٤١٤٤٩٧ (+2)

alfra3ina@gmail.com

جميع الحقوق محفوظة لـ دار الفراغة للنشر والتوزيع والترجمة
يمكنكم متابعة أخبارنا وإصداراتنا من خلال شركائنا الاستراتيجيين

www.alitgan.net

موقع الإيتقان

www.zaat.vip

بوابة ذات

www.muhtam3.com

بوابة نبض المجتمع

مقدمة

عندما قرأت هذه النصوص والكلمات وجدت نفسى في عالم ممتزج ما بين الواقع والخيال ما بين الألم والأمل ، الحب واللا حب فلقد استطاعت الشاعرة أن تفرض شخصيتها دون عناء وأن ترسم لنا بأناملها لوحة فنية رائعة من بستان الكلمات المتوهج بالرومانسية المفعمة بالحب والأمل في لقاء الحبيب كما تجد نفسك ودون أن تدري تتوغل داخل هذه الوجبة الشهية من النصوص .

فلقد استطاعت الشاعرة أن تترجم لنا بعض هذه المشاعر والأحاسيس الممتزجة بنضارة الحياة وبرائتها لتخرج لنا ديوانها الأول في أبهى صورة فلقد لعبت الشاعرة على سبر أغوار الحدث الوجدانى الطازج عبر توليفة أدبية استعارت سيرورة الحياة في أجمل وأشهى قصائد هذا الديوان فهو بحق تجربة شعرية جديدة ومغامرة جريئة تستحق القراءة.

إكرام عيد

إلى خيوط الشمس عندما تنسدل على الأرض
وتتوهج الحياة بلمعتها الذهبية

إلى كل من شاركني أناشيد الأمل

في رحلتى الطويلة حتى تخرج أولى كلماتي للنور

ميرفت هلال



أنا

أنا كل حاجة و عكسها
 أنا حرف ناقص نقطتين
 أو كلمة مقسومة في حنتين
 لا عارفة تكمل
 و لا مرتاحة في رسمها
 أنا وردة مقطوفة من فرعها
 و ورقها واقع على أرضها
 بتحاول تلملم شملها
 لكن معنداها السنين
 أنا قلب اخضر عمال يدوب
 تايه و محتار في الدروب
 مش لاقى قلب يخاف عليه
 مع إن كثير إيدين ممدودة ليه
 لكن شقاه مكتوب ع الجبين

أنا طير و طائر في سماه
جناحاته معاندة خطوته
كل السكك مش سكته
و الكل آخذ حته من دنيته
و هو رافض
يعيش وياهم حزين
أنا غنوة كتبها شاعر قديم
قلبه مليان بالأنين
طلعت الغنوة جميلة
لكن حزينه حبتين
أنا نجمة في سماها منورة
الكل شايف لمعتي
و بيحسدوني على دنيتي
لكن محدش سألني يوم
فين فرحتي
و إلي خدوها مني

عائشين فرحانين
 أنا كل حاجة
 و عكسها
 أنا حرف ناقص
 نقطتين
 لكني حالفة
 لكملة
 مع أني مش عارفة
 إزاي و فين
 و لو الخير أتأخر علي
 هزيد دعائي
 و أقول أمين

من غيرروح

حبة ورود اتجمعت
 على قلب أبيض
 بس مفهوش روح
 حالف يعافر في الحياة
 حتي لو كان الطريق
 كله ألم
 كله عذاب و جروح
 ماشي في دروب ضيقة
 عمالة تاخذ منه
 كل حاجة و تروح
 ماشي ونبضه بيخنقه
 كاتم همومه
 فاقد الأمل في البوح
 حبة ورود خلقت أميرة
 العطر منها يفوح
 لبست حذاءها
 و جرت في البراح

مش عارفة فين
 و لا منين هتروح
 و لما حبت تعشق دنيته
 قسيت عليها
 و ملت طريقها جروح
 صرخت بصوتها
 لكن مين بيسمع
 ده أصله صوت
 مبجوح
 قطعت حباله
 من البكا
 من الألم و النوح
 حبة ورود دبلت
 في بستان
 مات فيه
 الضمير و الروح
 زي عصفور
 يجبروه

لازم يغرد
 وهو من الأساس
 مدبوح
 كل الي طلبه يعيش
 وسطكم
 بالعادي و المسموح
 مأخذش منكم
 غير هموم
 و جروح
 و حبة نوح
 حبة ورود
 اتجمعت
 عملت أميرة
 بس من غير
 روح

عصفورة طائيرة

برة الشبابيك

عصفورة طائيرة

محتاسة في دنيته

و حائرة

كل ما بتفرح في حياتها

ييجو يحاوطوها

بدايرة

يقولولها بلاش

خليكي جوة

بينك و بين دنيته دي هوة

لا هتعرفي تمشي على كيفنا

و لا تعرفي تتعاملتي بقوة

أصلك عصفورة بريش نعام

و احنا بني ادمين لكن أوهام

كل وعودنا في الهوا طائيرة

و كلامنا كله في الأحلام

و أنت يا عيني بريئة

و صافية
 عايمة فوق الماية
 و طافية
 ملكيش في علامة الاستفهام
 و لا ليك في الحيرة
 و لا الأفلام
 واضحة صريحة جميلة
 مريحة
 لكن زمنك ولا و عدى
 لا بتعرفي يأس و لا استسلام
 عصفورة طائرة بره الشبابيك
 طالبة تسيبها
 تعيش في سلام
 خدوا دنيتكم و دي سكتكم
 و سبوها في دنيتها
 عايشة في الوحي
 و الالهام

عائادي

كله عادي
 الزمن ده
 كله فاضي
 كله عامل
 نفسه قاضي
 عيش لوحده
 بردو عادي
 طول ما قلبك
 صافي راضي
 أنت ملاك
 طيب تعالى
 أقف قصادي
 نشوف مين
 فينا كان حملة تقيل
 و مين فينا جرابه فاضي
 كله عادي
 بيع و بدل
 و قلبك للي
 رايح و إلي

جي يا عم
هادي
قلبي انا
ما عاد يسمع
مهما تنادي
كل واحد
فيينا عايش
في وادي
غرقان في
همه سايح
في دمه
و مين فيكم
بيحس بيه
الساعة دي
فيه إلي عايش
في الدنيا لنفسه
و فيه عايش لغيره
وياريت كله راضي
و ياريت ميعملش
فيها على غيره قاضي

إزاي قدرت

إزاي قدرت تخلي

الحلم يتخفق

جوة الحقيقة

إزاي بتتلون

كل الوشوش

و ترمي على

الصورة رتوش

و تقطف أوراق

الزهرة البريئة

إزاي قسيت

و مسحت سنين

هواك و كأنها

كانت دقيقة

إزاي تخون

ما بيننا

كل العهود
الوثيقة
إزاي فجاة
بتظهر لي
حقيقتك
كانت في عمق
أكاذيبك غريقة
إزاي أنا ..
ما عدت أنا
اتحجرت جوايا
مشاعر كانت
زمان حلوة رقيقة
إزاي قدرت
تخنق الأحلام
جوة الحقيقة

كله رتوش

حكولي عن حد
 أنا معرفوش
 و لما انتبهت لقيتة انا
 قابل في دنيته كثير وشوش
 فيها الجميل وفيها الفشوش
 و الكل علم عليه رتوش
 لسا فاكرها باليوم و السنة
 و فجأة سرحت
 في الحياه
 شفت الوجوه
 بتمر ادامي
 و تحكى حكايتها زي الرواه
 كثير فيهم ميلز موش
 لكن دي اقدار
 متقسمة

فيها إلي كان
 على راسي تاج
 و فيها إلي أشوفه
 و معروفش
 مه أصله لابس
 كثير وشوش
 والشر جواه بير غويط
 و الضحكة على وشه مترسمة
 حكولي عن حد بطل
 عايش في الدنيا بالأمل
 عايش و قابل قسمته
 و سكتة كلمة و عمل
 لا عاد بيسمع لحكايات
 و لا يصدق أغنيات
 يمكن لآخر القصة وصل
 و القصة بتقول

إن البداية و النهاية
مرسومة ليك
إوعى تحاول ترتجل
و لا تعاند في القدر
هما يومين عيشهم يا قلبي
و كبر على رأي المثل
و حكولي عن حد
أنا معروفش
لما انتبهت لقيته أنا

خيوط الشمس

فرحانة بحروفي
تبدد بينها أحزاني
يهون خوفاي
تعطر بينها أيامي
أشوف الحلو
في ظروفي
و انسى المر
وأضحك للحياة
مهني أقدار الحياة
ضيوفاي
شافتني بسحب
إيدي من الدنيا
لامتني على يآسي
و عزوفاي
خيوط الشمس

مرسومة على كفوفي
 تنور لي دنيايا
 تزيد شوفي
 تكتب قصتي
 بالنور وتغزل
 من الحرير
 دمعي و حروفي
 لا شوف الشمس
 غربت يوم
 و لا قمر دنيتي يتسبب لي
 في خسوفي خيوط الشمس
 حمياني و قلبي
 بيها بستانني
 و مين أدي
 انا خيوط الشمس
 في كفوفي

عصفور

دي طائيرة بجناح عصفور
 يتدارى في وسط السور
 مش عايز حد يشوف جرحه
 و يلف عليه و يدور
 يحلم بجناحه قريب
 يحميها من كل غريب
 يداوي القلب المقهور
 طائيرة و بتشوف دنيتها
 من نظارة براءتها
 مليانة ورود و زهور
 طائيرة و قلبها وياه
 مش شايقة
 من الدنيا سواء
 تتحدى الدنيا عشانه
 و تكون صحبته و هداه
 طائيرة مسلمة لله
 مش طالبة القصة بطولة

و لا طالبة قلب جسور
 لكن محتاجة مشاعر
 إنسانة زي الحور
 عايشة
 في عالم خارج
 من بره السور
 لا قيود منعت كلماتها
 و لا بتغير طبيعتها
 طول ما الدنيا
 مساعداتها
 تطير زي العصفور
 طيارة بجناح
 مكسور

قطر الغلابة

قطر الغلابة مليون
 بالهم و الأحزان
 واحد فقير شقيان
 على شاب من دنيته
 هرب ما لاقى أمان
 و عجوز يكافح
 على أكل عيشه
 يبيع فطير و لبان
 و الدنيا قاسية
 عليهم مكفهاش
 ظلم بني الانسان
 قطر الغلابة نظيف
 قلبه نقي و عفيف
 مش لاقى لقمة عيش
 لكن عامل شبعان
 قطر الغلابة حنين
 دايم يقابل صاحبه

و ياخذه بالأحضان
 و صاحبه زيه حزين
 لا عارف يلاقها منين
 ولا عارف يقول على فين
 ماهو ملهش لسان
 يا دنيا خفي شوية
 مفكيش دفا و حنية
 و بتيجي ع الغلبان
 قطر الغلابة رحيم رايح لرب عليم
 و لينا عنده وعود بجناين الريان
 قطر الغلابة محمل بص عليه و اتأمل
 كام شنطة و كام جثمان
 سواق و خط و سكه
 كله تايه سكران كله برئ غلبان
 و كل شئ متسجل و ده إلي مش عارفينه
 و مكنش في الحسبان قطر الغلابة بيبكي
 لكن هناك ديان

مش هصدق

او عى تحلف يممين

إن حبي غالي

و مكتوب ع الجبين

و إن قلبك دايب

وإن في بعدي

النوم عن

عينيك غايب

و إنك في كل

كلامك امين

او عى تحلف يممين

إن عشقك

من زمان

و إنك هتدينى

الأمان

و إن قلبك

مليان حنين

او عى تحلف يممين

و تقول عينيك
 شبعتم دموع
 و إنك بتستنى
 مني الرجوع
 و إني بجري
 في الوتين
 و إن نبضك
 بينادينني بصوت
 مليون انين
 او عى تحلف يمين
 إن عمرك
 ما شفت غيري
 و إن كل همك
 سعادتي و مصيري
 و إن ألمي
 بيخليك حزين
 او عى تحلف
 إنك كنت جوه قلبي

متقيد سجين
 و إن رغم
 كل البعد بيننا
 لسه حبي
 جوه قلبك رهين
 مش هصدق لأن قلبي أصدق
 من كل كلمة قلتها
 و من كل كذب السنين
 مهما قلت مش هصدق
 و عايزه اقولك بكرة نتقابل
 بعد كتير سنين
 ساعتها هتقولي
 مانتز عlish مني
 حسيت بحزنك بس متأخر اوي
 أصل كله
 كان سلف و دين

يا أميرة

اوعى حزنك
 يا اميرة
 يسكن فى
 الزحمة ضلوعك
 اوعى عيونك
 تألف الأحزان
 وتسكنها دموعك
 رددى ضحكة زمان
 تملا دنياك
 و ربوعك
 عتمة لياليك
 نوريها
 دي الشمس
 تستنى سطوعك
 فى غيابك
 الدنيا ظلمة
 و الكل يستنى

رجوعك
 اخلعى ثوب الهموم
 وارمى على
 ربك حمولك
 كل ما تضيق خطاك
 طهر نواياك يصونك
 اوعي حزنك
 يا اميرة
 يطفئ بهجة
 حياتك
 ينسبك أمنياتك
 لسه الرحلة طويلة
 محتاجة منك ثباتك
 و إلهي جي أحلى
 و إلهي هيحليه
 هو إيمانك بذاتك

لحظة سكات

في لحظة سكات
 مر شريط حياتي
 ادام عينيا
 شريط مليون بالذكريات
 في لحظه حنين
 للي ماتوا و اللي راحوا
 أخذوا من عمري معاهم
 أجمل سنين
 ذكرى ويا أم
 عاشت تكافح
 وذكرى أب متغرب
 جي رايح
 ذكرياتي في الدراسه
 و بنت مقفله
 ناقصة كياسة
 ذكريات اصحابي
 و تاريخنا الطويل

و مواقف عشناها
 و عديناها
 و ايام شفنا
 فيها المستحيل
 في لحظه تأمل للمصير
 لقيت ابني الصغير
 بقى قصاص عيني امير
 و اللي كانت بسكوته شقيه
 بتخطف القلب بحنانها
 و لا فيه شبيه ليها في جمالها
 خوفي عليها اكثر كثير
 و عقلي مشغول بيها اسير
 و في لحظه سألت
 هو لسه فيه ادامي وقت
 هيبجي يوم
 و أقول رسالتي انتهت
 و لا مش مكتوبلي أشوف
 ثمرة سنيني

ايه المكتوب على جبيني
 فى لحظة سكات
 مرت كل الذكريات
 اللي عدى منها
 و اللي فات
 مستنيه فى لحظه
 ابقى في دفتر
 ذكريات
 ابقوا ساعتها
 ادعولي
 و اغفرولي
 في اخر لحظة
 سكات

أنا بعشقك

و الله قلبي

مصدقك

انك لا تعرف

تخون و لا قلبي

يوم عليك يهون

لكن حروفي

مكدباك

عايزة تقولك

إن دنيتي

وحشة بلاك

و إن مهما

قسيت

قلبي مش

قادر يكرهك

رغم ان بعدي

مش فارق معاك

أنا بعشقك

و كنت دائما

مصدقاك

عمرى ما

كنت مكذباك

لكن عيونى

مشتقاك

و حنينى لىك

كسر ضلوعى

مش هعذرك

لا لا ..

و لا هرحمك

إوعى ياقلبى تسامح

فى إلبى فات

و تنسى قساوة قلبه

و مرارة الذكريات

خلىه هناك

و خلىك بعيد

إن كنت

حتى بتعشقه
خليه بقى
يدوق قساك
أهو علمك
معنى القساوة
لما آذاك
و أوعى
تصدق كذبتة
خليه يمشي
في سكتة
و انسى أنه
كان يوم هنا
او كان معاك
أنا بكرهك
مع أني جوايا
بيقول بعشقك

على الدنيا السلام

كده خلاص
خلص الكلام
كده خلاص
آخر كلام
مبقاش فيه
حب يستاهل
ملام
مبقاش فيه حاجة
تستاهل خصام
يله سلام
لملم حاجاتك
القديمة
وكم ان شوية
الحجج العظيمة
و ارحل أوام
خلصت فيك كل الكلام

دورك خلص ونزل ستار
 المسرحية مثلته تمام
 و عليك و على
 قلبي السلام
 كنت البطل
 و الكل صقف
 باهتمام
 خدت الجوايز
 و النياشين
 يله علقهم
 ع الكمام
 و اتباهى انك
 فارس همام
 هزم الاميرة
 و حطم قلبها
 و الله على
 الدنيا السلام

ماتصدقيش

و إن جه يقولك
وحشتيني ماتصدقيش
و إن هان عليه ألك
أرفضي و ماتسكتيش
هو لو حبك حقيقي
إزاي في بعدك
هيقدر يعيش
و لو بالأعذار
بدا كلامه .. اضحكي
و ماتزعلش
و لا تسألش
أمشي في طريقك
و لطريقه ماترجعش
ماتصدقيش
و لدموعه المزيفة
ماتمسحش
خليه يعيش

و عليه أفرجي
 و لذنبه معاك ماتغريش
 و ماتياسيش
 و للحب إالي جواك
 ماتكرهيش
 خليه ذكرى قديمة
 في ركن الذكريات
 رطوش في صورة
 باردة متعلقة
 أو مجرد خرابيش
 و أتعلمي تداويها
 و بطهر قلبك تشفيها ..
 اتعلمي و ماتخافيش
 تمشي في حياتك
 و على غيرك ماتسنديش
 و إن جه يقولك بتوحشيني
 أضحكي و ماتصدقيش

وليه

ليه لما النسيم
 بيعدي بين شعراتي
 بسمع ضحكك
 ليه لما الورود بتفتح
 بلاقي روعي بلتقت
 ادور عليك
 مهى الورود في حياتي
 هي بصمتك
 ليه لما الحياة
 بتقفل أدامي كل السكك
 يفضل طريقك هو أجلي
 واختار سكتك
 ليه لما عيوني تبقى حزينة
 و قلبي مليان بالألم
 بشوف شعاع من نور
 يديني الأمل من نظرتك
 ليه لما تضيق انفاسي

و يموت جوايا احساسى
و أحاول اكتب عن الحياة
اروح لذكرى حلوة
رسمتها يوم بسمتك
ليه بقيت أنا وانت
روح واحدة
اتجسدت في كياني
خلقت مني حد ثاني
حتى كل أفكاري
لو هراجع نفسي
في كل فكرة
هقول دي فكرتك
ليه كل الأماكن
إلي بروحها
ظلمة في عينية
مش لاقية فيها حنية
و لما أقابلك صدفة
بنسى نفسى

و بنسى قسوتك
مع اني عارفه
إيه هي الحكاية
و إيه قصتك
و عارفه إني
كنت البداية
و أنا النهاية
و مهما رحت بعيد
هفضل أنا دنيتهك
قررت خلاص
انسى الزعل و أعيش
بالذكريات الحلوة
ماهي فيها رحتهك
و فيها صورتك
و معاها مكتوبلي
أعيش جنتك

و طلع النهار

بنيت بيني و بين الناس جدار
 لا يبطلع عليه شمس تنور
 و لا يبشوف النهار
 و فجأة طلع الأمير
 و في وسط الزحمة
 قال أنا كلي خير
 كان ليه مكان كبير
 مكتوب عليه حروفه
 و كنت ليه أسير
 بفتح ايديا و أمدھا
 ما حسبت يوم هيجي
 و يصدها و لا كان في ظني
 إن اللي يغدر يليق عليه
 ثوب الأمير و في كل يوم يقرب
 يكتب على ظهره
 حققت انتصار

ماهو أصله شاطر
 و بايده كسر في الجدار
 وأنا أمد أيدي أقطفه الورود
 و أوفي في الوعود و أحطم في القيود
 و ف يوم لقينه بيغير مسار
 و يحط طوبة فوق طوبة
 و بيعلي الحواجز ..بيحول
 أياي لظلمة و نار
 و الغريب إنه لسه لابس ثوب الأمير
 و لسا بيمثل دوره باقتدار
 و لقتني بكره توبه
 و بتمنى غروبه
 لقيتني تهت
 في وسط أكاذيبه
 و رجعت تاني انا
 أبني ما بيني و بين الناس
 ألف سد و بعدت
 عن دربه بألف ألف دارو طلع النهار

كراكيب قديمة

وفي وسط كراكيبى القديمة
 لقيت حاجات و لا ليها قيمة
 كراكيب في الزمان ده
 بتترمي و يمكن يكون
 حرصك عليها جريمة
 ذكريات على كلمة حلوة
 وشوية أبيات في غنوة
 و قلب مخلص عايش بنية سليمة
 لكن طيب النية
 لا بتنفع صاحبها
 حتى الأحاسيس بقيت عقيمة
 لميت حاجاتي و قعدت افكر
 لمين أبيعهم بسعر أكبر
 و مين يقدر و في النهاية
 رسيت أني أعملهم تمية
 كل ما أبص عليها

أقول في يوم
كان عندي حاجة في ظني
كان ليها قيمة وسط الكراكيب
لقيت أسم محفور جوة ضلوعي
حاولت أشيله من كتر الألم
نزلت دموعي حاولت اسيبه
لقيت فات الأوان و لا ينفع رجوعي
طب اعمل إيه قلت اقفل عليه
يمكن في يوم يكون له في
حياتي قيمة ماأنا عارفة لو شلته
إيه هيجرى و إزاي في لمح البصر
تتحول الطفلة البريئة لروح يتيمة
و لا اقولكم خلاص كلها حاجات
و لا ليها قيمة خلاص حرمت
في الدنيا دي أعمل حكيمة
و فى وسط كراكيبى القديمة

ظروف

أنا عايشه زيك
 حبة ظروف
 فيه منها حب
 وفيه منها خوف
 متشفش من برة
 و تقول أميرة
 جمالها غير موصوف
 لا تعرف حياتي
 و لا ذكرياتي
 و اللي يعيش يا ما ببشوف
 أنا عشت زيك حبة ظروف
 فيها الهموم مرصوصة
 ياما صفوف و كل ما اكتب
 ببطلع شوية من همومي حروف
 بعيش معاهم خيال جميل مصفوف

منتقي على ذوقي زي الورود مقطوف
 لا فيه حقيقة و لا شكوك و لا خوف
 ده دنيا تانية بخرج معاها
 عن العادي المألوف بعيش بحرية
 لا يمنعي خوف و لا قلم مقصوف
 لا شمسي ليها كسوف
 و لا لقمرى خسوف
 عايشة ما بينكم
 لحنى جميل معزوف
 بتمنى حروفي
 ما تلاقي منكوا عزوف
 بس اعرفوا
 أنا مش ملاك م السما
 أنا بعيش معاكوا
 و زيكوا حبة ظروف

ضحكة بهتانة

أنا ضحكة بهتانة
 بين دمعتين تايهين
 أنا بسمة حيرانه
 بين جرح مالى جبين
 أنا بكرة و امبارح
 و غصن جميل طارح
 مرة فرحة قلب ومرة تانية أنين
 يمكن لنفسى ظلمت أو ظلمتنى السنين
 أوعى يا عين من البكا
 وأوعى تتوه ضحكك
 فى شط كله حزين
 مش لايق عليكى الشجن
 و لا باين عليكى الزمن
 أدعى تهون كبوتك
 و هقول معاكى امين

مش بالكلام

العمر عدى
 و لسه جي بيسلم
 قالوا المودة نحسها
 ماهو مش بالكلام
 و لا باللام
 القلب بيبس
 حتى لو مش هنتكلم
 العمر عدى
 و فات منه الكثير
 و قلبه سجان لقلبي
 و أنا و ياه أسير
 لا عارف أرجع
 و لا عارف أقول سلام
 العمر عدى
 عشته معاه سعيد

راضي ببعده
طيب إيه الجديد
و كنت بستغرب
إزاي عشقي يزيد
لا نسيته و أنا صاحي
و لا سابني في الأحلام
العمر عدى
و هو ساكن ضلوعي
ماهو نبضه بستانني
حتى لو سالت دموعي
عائش و مطمئن
لا فارق معاه
هروبي من رجوعي
هنياله ضامن حبيبته
لكن يا ترى
هو ضامن الايام ؟

مش خايف ما بين إديه تعدي السنين أوام
 لا يشوفها في دنيته و لا حتى بالأحلام
 العمر عدى و أوعى تصدق
 حبيب يغيب
 و يرجع بحبه بيتصدق
 بكلمة حلوة و لا بكلمتين
 و وياهم يغيب
 في الزحمة يوم و لا يومين
 الحب بيخلي القلب فرحان
 و أحيانا حزين
 لو فارقك حبيبك
 يملك الأنين
 لا هتعرف تداري و لا تهرب
 من المكتوب ع الجبين
 مهو مش بالكلام يا قلبي !
 و لا باللام !

ده لو

لو شفوك بعيوني
 مرة هيسألوني
 هو ده بدر في تمامه
 و لا ده عنتر زمانه
 و لا لو شافوك بقلبي
 هيبطلوا و الله يلموني
 لو شافوك بعيوني أخاف
 يحصل ما بينهم خلاف
 يعجبوا بجمال حضورك
 و لا السحر إلي ف عيونك
 و الله أخاف ليحسدوني
 طيب لو شافوا حبك
 و الحنية إلي ف قلبك
 مش بعيد يجروا عليك
 يا قلبي و يسيبوني

و لو حبيت أحكي عليك
 الكل دايمًا يسكتوا
 و بيسمعونني
 ومهما بلغ حلو الكلام
 مش هيوصف جمال
 صورتك جوة عيوني
 دايمًا بشوفك شهي
 مش في الملامح بس
 لا حتى ف روحك
 و ساعات بقول
 مش بيصدقوني
 لكن أكيد لما
 يشوفك هيصدقوني
 و هيشوفوني
 جوه ملامحك
 و هيعرفوني

و لا اقولك مش هقول
و أحكي عليك
أنت لازم تختفي
جوة جفوني
و من زمان قالوا
داري علي شمعتك
لتنطفي .. و انت شمعتي
و أنت كمان نور عيوني

ليه

هي ليه الدنيا ملهاش
 طعم في غيابك
 و السما الصافية
 بعد حزني اتعكرت
 و الميادين حزينة
 و الأعلام اتنكست
 حتى العصافير
 لغناها بطلت
 و البيوت بقت قديمة
 و المباني هجرت
 كل شيء في عنيه قاتم
 و الأمانى اتبددت
 هو ليه الطير حزين
 و الشجر وقعت فروعها
 حتى البساتين قفلت بيبانها

و القلوب فقدت أمانها
 و م الحنين اتزلزلت
 هي ليه الدنيا ملهاش
 طعم في غيابك
 ليه افراحي واقفه
 طوابير عند بابك
 حالفة ما تعدي الجسور
 بانية بيني و بينها
 ألف سور
 عارفه أنك أنت الوحيد
 إللي قلبه جسور
 إللي حطم كل أحزاني
 و بدد عتمتي
 حولها نور
 طيب ازاي بتسأل
 أد إيه بحتاج وجودك

و أنا طفلة لسه
 بدور جوه حدودك
 عايزه اطير وياك
 و أنسى الحزن بوجودك
 و لسه جي تسأل .
 هو ليه الدنيا وحشه بدونك
 طب رد أنت يا قلبي
 بلاش أنا يمكن حروفي
 عاجزة متسلسلة
 وصله أن من غيره
 كل بيبانك متقفلة
 مفضلش غير شعاع
 صغير
 واصل ما بين قلبي
 و قلبه
 مخليني في الحياة مكملة

و أني عشانه
حاجات كثير متحملة
و هفضل كده
متحملة
و لنظرة واحدة من عينه
هعيش حياتي
متأمله
و مهما يلومني
هفضل معاه
مكملة
لأن الدنيا فعلا
ملهاش طعم في غيابه

بلاش تغيب

اتعودت ان اشوفك
 و أملّي عيني من عنيك
 و ارتاح لطيفك
 أتعودت أن أنام
 وأنت آخر اسم برده
 مهو انت قلبي
 ألي كنت بحاول أسعده
 و مهما بعدت
 بينا السنين
 الاسم ده هفضل أردده
 و هسجله علي
 جدران ضلوعي
 و لو نزل يوم
 ويا دموعي

همدده و همنحه
 من روجي
 روح هتوجدده
 و هيتولد تاني من جديد
 مهو من غيره عمري
 ما هيكون قلبي سعيد
 مهو مش بايدى
 نبضي وياك
 ماسكه في ايد
 و الروح في ايد
 طب قولى ازاى هعيش
 لو كنت منى يوم بعيد
 اوعى تقولى خايف عليك
 و للقصة دي بلاش تعيد
 خايف على
 تكون فى ضهري

سندي و ظلي
 لو حتى الدنيا تنتهد
 و تتخلق ثاني من جديد
 خليك في دمي بتسري في الوريد
 مهما بعدت لك في قلبي
 كثير رصيد تعالى نحسب
 أيامنا سوى
 و العمر المديد
 و اد إيه عدينا مآسي
 و كل مرة تردني لقلبك
 ثاني من جديد
 عنك عمري ما هبعد
 و هو ده آخر الكلام
 و هو ده بيت القصيد

إو عديني

او عديني تكوني جنبي
 لما يكسيني المشيب
 لما روعي تتوه مني
 لما شمس شبابي
 بين متاهات الضلعة تغيب
 او عديني تصوني حبي
 و أفضل جوة قلبك
 طيب العشرة قبل الحبيب
 إو عديني تبقي سري
 شائلة همي و سائدة ظهري
 و محتاجش أبدا
 في وجودك للغريب
 إو عديني تبقي
 دوا لجرحي
 لما يعجز عن

دوايا الطيب
 إوعديني تكون أمني
 لما يغدر بي زمني
 لما كل ندوبي تعصى
 الأظفة و لا تطيب
 إوعديني يا حنة مني
 تلقني في دموعي الملام
 تسمعي رغم سكاتي
 كل الكلام
 تخففي عني الآلام
 ومهما زاد حملي عليك
 اتحمليني
 منت عشرة عمري
 و أنت أقرب القريب
 إوعديني أبقي ذكرى
 ذكرى عدت بس حلوة

أسمعيني في كل كلمة
تتغنى في غنوة
إنسي كل قسوة
شافها قلبك و أي نزوة
عدت علينا أحلف بربي عمري
ما قصدت أن أهينك
أو إن إيدي تسبب يمينك
كله كان قسمة و نصيب
إو عديني تكوني جنبي
حتى في اليوم العصيب
لما روعي تلقى ربي
و نفسي في الدنيا يغيب
إو عديني

طيارة ورق

أنا قلّمي
 طيارة ورق
 سايبه مكانها
 و طيارة سعيدة
 لا بيرضيها
 تعيش في عذاب
 و لا يوقفها
 حضور و غياب
 بيها بعيش
 الحب قصيدة
 ملكي الدنيا
 طويلة عريضة
 و لا تهزمني
 في يوم أحزاني
 و لو ملّيت

زمني و مكاني
 دي بتحضني
 بين جناحتها
 و بتوديني
 لدنيا جديدة
 طيارتي قوية
 و عنيدة
 لا بيكسرهما
 في يوم إنسان
 و لا تعرف
 معنى التنهيدة
 بين أبياتي
 بحلم و اتهنى
 و بشوف نفسي
 عايشة في جنة
 طفلة بريئة

فراشة وليدة
 أنا طيارتي
 فاهمة إحساسي
 و بتكتب كل
 إلي في راسي
 مرة تاخدني
 لحد نزار
 و المرة الثانية لسي جويده
 أصل أنا قلمي
 طيارة ورق بتعيشني
 كل دقيقة قصة جديدة
 و دي من غيرها
 عمري ما كنت
 هبقى سعيدة

موج البحر

سألت موج البحر
 مالك ثاير زعلان
 قالى أنا من دنيتكم
 خايف و قلقان
 عمري ما جاني
 فيكم حبيب له أمان
 كله جي يشتكي
 من الغدر و الحرمان
 حولتوا أفراحي
 لهم و بكا و أشجان
 حبيت زمان قربكم
 بتعمروا الشيطان
 بشوف معاكم ورود
 و خلق بالألوان يا بني الإنسان
 حذرني شطي كثير

من بني الانسان
 ما سمعت لنصيحته وبني صبح شمتان
 و أنتوا ما رحمتوني
 في همومكم أنا غرقان قلبي بقي أسود
 لا فيه لولي و مرجان و إلي يدور فيه
 يلاقه ملان أحزان
 خليك لدنيتكم و رجعولي زمان
 زمن القلوب الصافية و الأهل و الخلان
 مشتاق أغاني حليم
 و الست و الرحيان
 بتسمعونني بيكا و شاكوش
 و ساعات كمان شعبان
 على إيدكم ملاني
 الشوك ما فيكوا أي حنان
 ما تخفوا عني شوية
 يا بني الإنسان

جورية

كلام الشعر
في عرفي
لسان القلب
و نبض الحب
و أنا لو
قلت الشعر
فيك هقوله
بحرية
لأنك وردة
جورية
و أجمل من
خلق ربي
يا حورية
و شعرك خصلة
شمس ذهبية

و فيك الكلام
 يتحب
 صوته زي
 الهدير العذب
 و طعمه عسل
 مكرر رطب
 وإحساسي بيك مش ملكي
 ده أصله هبة من الرب
 و لو نويت أكتب
 في شيء ثاني
 يخونني القلم
 و أعود لوصفك
 لأنك الوحيدة
 إلي ساكنة القلب

عنيك معركتي

عنيك أرض لمعركتي
 أعيش فيها زمن ثاني
 هصارع فيها أحزاني
 بتمنحني لفرحي دليل
 بيرسم حدود وطني
 و بيرجعلني عنواني
 أنا تايه وكنت ضرير
 وصلت بي شراع الحب
 رمت بي على رمشك
 لقيت بري و شطاني
 و حضنك لي دفاني
 رميت رمحي و أسلحتي
 و سلمتك نبض وجداني
 أنا من غيرك أبقي ضعيف
 و حبك سندنني و قواني

ياريت عشقي
 يزور قلبك
 و طول العمر تهواني
 تحفر أسمي على جبينك
 تعيش بي ما تنساني
 عنيك أرض
 لمعركتي
 و بكتب فيها ألحاني
 لما بتحضني بتسييلها
 بضيع من وقتي و زمني
 ياريت تحبسني جواها
 و تقفل علي ألف باب
 رضيت بيك أنت سجاني
 هعيش معاك الجنة ونعيمها
 و لو أختارت حرיתי
 هعيش وردة على جبينك

و تكون لي أحدى
 بستانى
 على أرض معركتى
 نسيت نفسى
 و زمانى
 نسيت همى و أشجانى
 على أرض معركتى
 لقيتك
 و مين هيلقى روحه
 و يضيعها من تانى

ضحكتك

و بتضحكي
 الدنيا تحلو
 برنة ضحكك
 و لا جمال الغمزة
 في خدود حضرتك
 و جبينك الأبيض
 ينور دنيتي
 ياااا دهوتي !
 من عشمي فيك
 بتمنى نظرة
 و أنت فايئة
 في سكتي
 ولو من بعيد
 ألمح فيها نظرتك
 صوت الموسيقى

يدق في قلبي
 مع خطوتك
 أتعثرو أدوب
 أتوه و أنسى
 وأمشي في سكتك
 أقول نكتة بايخة
 و أضحك عليها
 منا أصلي عايز
 أسمع ضحكك
 مع خطوتك
 أشوف ولاد الحي
 ييموتوا في طلتك
 و بيغزلوا في خيالهم
 أحلام معاك
 بيت و عيلة
 و أيام جميلة

ناري تقيد
لو كلمة
منهم مستك
و بدعي دعايا
لربي ما حد
يدخل دنيتك
أملّي تكوني لي
و ألقى في قربك
نعيمي و أحظى
بهنايا في جنتك

ساعات

ساعات بشتاق لك
 و الاقي روحي
 بتروحلك و تعصاني
 أغالب فيك حنيني
 و بوحى يسهيني
 و يندهلك و أدوب تاني
 ساعات بشتاق لك
 و دمع عيني يعصاني
 يعاند كبري.. يتمرّد
 يقولي أنك بتهواني
 يلومني أني
 رحت بعيد
 و من يومها
 الفرحة فيتاني
 و أحزاني ملت

روحي و أيامي
 بقيت غايبة عن الدنيا
 ما بشوف منها
 غير صورة ليك
 مرسومة في وجداني
 بقلب ذكريات
 بعيشها جوة أوهامي
 عارفة أنك بتهواني
 لكن أنا طبعي سجاني
 لا بستسلم
 و لا هسلم
 و لا يعرف الخضوع
 سكة لشرياني
 أنا ممكن أتعذب
 و معايا هتتعذب
 لكن مش ممكن أبقى

في يوم أنا الجاني
 لو أنت أختارت اكون
 حلمك أنا حيرتك انا مجنونة بيبك
 لكن اوعي تظن أجيلك و أسلمك
 روحي تهواني ده شئ ثاني
 و أكبر من كل إمكاني
 أنا قلبي علي عزيز
 و يمكن أنت حد لذيد
 لكن افضل لي تنساني لا تهواني ..
 لا تتعب معاك روحي من ثاني
 أنا وردة في بستانني و قلبي ملكي
 لا هتوصل إليه إيدك
 و لا إنس و لا جان
 خلص الكلام بيننا و بقولك
 ياريت تبعد و تنساني

كلمتين

كنت قاعدة لوحدي مرة
 حببت اكتب كلمتين
 أصلي كنت فرحانة و سعيدة
 و بالي رايق حبتين
 بصيت لنفسى في المراية
 شفت بنت حلوة شويتين
 راسمة عيونها الجميلة
 و فوق حدودها وردتين
 و أفكرت ذكرى حلوة
 فات عليها يدوب سنتين
 قلبي دق بسرعة جدا
 افكرت كنت فين
 لما قالى همسة حلوة
 خطفت القلب في ثابيتين

اتلبخت فى شبر مية
 و ارتعشت منها الايديين
 ضعت بين رقة كلامه
 و لا تسبيلة العينين
 لكن صاحبكم شقية
 و يمكن واعية حبتين
 لا ينفع معاها روميو
 و لا كلام الليل يا عين
 قال تعالى نتمشى حبة
 قلت فين الدبلتين
 قالى دبلتين إزاي يا هبله
 هو انتِ جوليت و لا عبله
 انت ساكنة جوة قلبي
 و يوم ما اتجراً و أطولك
 لك من السما نجمتين
 مش تقوليلى دبلتين

ضحك علي بكلامه
أصله بجد شاب زين
و من يومها للنهاردة
هو نبض قلبي
و سكنته الوتين
و يوم عدى و الثاني
و بقى الن فى العين
يرضيكوا يقول علي هبله
و الله بيني هبله حبتين
كنت قاعدة لوحدي مرة
حببت اكتب كلمتين

بتوحشني

بحكم انك بتوحشني
 و بيني و بينك
 ألف باب مقفول
 يبعدني .. ييمنعني
 بحس بقلبي يوجعني
 بحكم أنك بتهواني
 ما تنساني
 و مهما طال البعد
 ما تقسى علي
 و ألاقي الدنيا بيعاني
 يضيع بيننا ألف ميعاد
 و ترجع لي من ثاني
 بحكم انك بتوحشني
 بلاقي روعي رايحالك
 و جايلك تنادي عليك
 ألاقي إيديا حضناني
 و رغم البعد
 كأنك جوة وجداني

بعيش في خيال
 يصحي كل أشجاني
 يداعب في احلامي
 أقوم من نومي و انا بحلم
 الاقي الحلم أدامي
 بقى واقع غريب
 ملوش دعوة بأحلامي
 أنادي عليك و جوايا
 أمل تيجي و تلقاني
 سدلت جدائلي علشانك
 و ريحة عطري سبقاني
 بحكم أنك بتوحشني
 تعالى اوام و هتشوفني
 و أشوفك يهدى إحساسي
 و تخرج مني أنفاسي
 حاملة أحلى عبير
 بحكم أنك بتوحشني
 بلاقي نفسي مع صورتك
 و أمني عيني من همسك

أشوف نفسي في مرايتك
أميرة هناك في مملكتك
أنام و أرتاح
بحكم أنك بتوحشني
يضيع مني الكلام و أسرح
بحكم أنك بتوحشني
بحكم اني بشتاقلك
تعالى خلاص كفاية جراح

كنت برتاح

كنت دايمًا برتاح

لما أشوفك

تترسم الضحكة

في عيوني

يصفى قلبي

و تنام جفوني

و ألقى روعي

لما كفي يرسى

ويهدى بين كفوفك

في الغياب

بوصل الليل بالنهار

يملاني ياسي

و يقتلني الإنتظار
أمشي ادور
على صورتك
بين ألوفك
كل الوجوه
اختلطت علي
حتي صورتي
أنتِ هيَ
مكتوب عليَ
في كل الوجوه
اني أشوفك
قربي مني
حبيبتي

زمليني
 إرحميني
 و إنسي خوفك
 إوعي ترميني
 زي كتاب قديم
 فوق رفوفك
 لسا صفحاتي
 بيضة جميلة
 عايز ألونها
 بلون حروفك
 إشرحيلي
 قلبي مالك
 فهميني

إيه ظروفك
 بيننا دايمًا
 خيط رفيع
 خايف في حزني
 أقطعه
 يوم ما أياس
 من عزوفك
 يا حبيبتي
 قربيني ليك
 وقربي و طيبي
 عيوني بشوفك
 كنت دايمًا برتاح
 لما أشوفك

صرخ زعق

صرخ زعق علي الصوت
 هي علقه يدوب و تفوت
 كل ما تفشل تعمل راجل
 زعق خليها من الرعب تموت
 شاكلك خايب عامل ناصح
 ضعفك بتداريه بالجبروت
 و هي يعيني رقيقة ضعيفة
 تنطق شهد و ضحكة ظريفة
 زي حمامة طالبة سلامة
 دايبة في ريشها زي الكتكوت
 صرخ زعق علي الصوت
 هي علقه يدوب و تفوت
 اشخط و انطر و ادى اوامر
 و علي سلامتها انت بتتأمر
 اقعد و امرح ازاز لب

و انسى انها انشى بتتحب
اقسى براحتك اعند غامر
قلبك جاحد قلبها عامر
و على دمعته اخرج سامر
بس هقولك كلمة وحاسب
هيبجى يوم و هتتحاسب
و على الجنة اكيد ما تفوت

أضحكي

اوعي الحزن
 يدارى فى عنيك
 اى دموع
 خلي بكاك
 صريح مسموع
 قلب المؤمن
 دايم راضى
 و مش موجوع
 زى الفرح ما
 عادى بيخلص
 بردو مفيش
 احزان بتدوم
 ولا فيها رجوع
 اضحكي خلى
 الزهر يورد

و العصافير
 ع الغصن تغرد
 لما البسمة
 تروح من عينك
 يبقى الشمس
 ماليها سطوع
 و الله بكرة
 عنيك هتفرح
 و لا هتشوفي
 شئ بيجرح
 البسي يلة
 توبك الابيض
 يشبه قلبك
 الابيض فاييض
 بكرة نقيد لعنيك شموع

هو أنت ممكن تفهمنى

و تصدق اني في بعدك تعبانة

و إن في كل حروفك

تايهة وحيرانه

وأنت شتاءك صيف

و ربيعك ضيف

و فى عز البرد

بكون وياك أنا حرانه

سألونى ليه رغم قساوته

كده عشقانه

ما تفكك منه

و تبعدى عنه

و في حبك ياما

قلوب ولهانه

قلتلهم هو القلب و هو النني

و هو الموت لو يبعد عني

و جوة عيونه
انا يا ناس غرقانه
بيقولى بريئة عبيطة
و مش فهمانه
طب يعني
بيقى جميل فى عيونه
لو كنت حويطة
و مش غلبانه
يرضيكوا يا ناس
بيقول عنى
عبيطة
و مش فهمانه
طب فهمني
و علمني أكون زيك
قلبي قوي وبقسى
و ببعد

من غير ما اكون حزينه
او زعلانه
فى زمان عيب الواحدة تكون
صافية
و مخلصه بأمانه
بس انا عمري ما هتغير
و لا هعرف اكون غير
طفلة بريئة
و حتى لو بردك نار
و معايا بركانك ثار
انا هفضل لعيونك
دول عشقانه
هو انت
ممکن تفهمنى

سكت الكلام

سكت الكلام و معدش
 فاضل غير وجع
 كل الوشوش رتوش
 و لا فيهم أصيل
 و لا فيهم واحد جدع
 و منين متمشي خطوتك
 تخونك و بردو ماشي
 مكابر و مش راضي ترتجع
 عقلك يدلك ع الحقيقة
 و قلبك يعارض .. يندفع
 و إزاي تسييه
 يدلك ع الطريق
 و هو دايم بالناس ينخدع
 و الدنيا بتيجي على البرئ
 و إلي من الأحزان شبع

و لو قفلت كل الطرق
أوعى تقرلها الودع
سيبها ع الكريم
هو العالم و المضطلع
ادعيه يبارك خطوتك
و كل الهموم هتزول
مهو دايمًا شايف و مستمع

خانة الذكريات

و كتبت اسمي
 في خانة الذكريات
 كان عمر عدى
 مفضلش منه إلا فتات
 قول كانت أميرة
 ساكنة المدينة
 و انا كنت قبطان بمركب
 على بيتها فات
 شربت من ايدها كثير حاجات
 خلتنى أحب أعيش وياها
 بكرة و قبله
 عمري إلي فات
 لكن انا قبطان بمركب
 لا لي مرسى
 و لا أي شاطئ

ينفع اسكنه وياها
 و فى غفلة منها
 سحبت من تحت
 رجليها البساط
 منا أصلي قبطان
 و بحار بعرف
 أغزل الكلام
 لكني في الفعل
 بتحول سراب شتات
 قول كانت شراعي
 و مركبي رسيت عليها
 و لما قويت انا
 حبيت أسيب ايديها
 و سبتها تبكي
 على إلي فات
 مهو أصلهم كانوا

شويه حاجات
و يدوب حبة ذكريات
عادي نحطهم سوى
في خانة الذكريات
يكفيني ذكرى
عشتها أيام رضاك

متسألنيش

هي ليه الدنيا
 مش سيباني
 لحظة أعيش
 و ليه عمالة
 في كتير تلطيش
 روعي مليانة
 بالخرابيش
 و ليه الحزن
 من يومي
 مبيسبنيش
 و كل خبطة
 و الثانية
 مترحمنيش
 و ليه الحظ
 متداري مني
 مبيشفنيش
 و كل ما أواجه
 الدنيا.. تقول
 منت قويانة

بقلبك الطيب
و مبتقعيش
وليه عايزاني
أكون وياك
و أنت شايلة
الكل جواك
و متصديش
و مين في
الدنيا وقف
جنبك
و مسابكيش
منا غدارة زي
الكل ..و الكل
شايف نفسه
و مشافكيش
مسحت دموعي
و قتلتها بكفاية
نصيب من الجرح
و ليه مليش عندك
قيراط من الفرح
خلي العدل
في ميزانك

و طبعك سمح
 بلاش تيجي
 علي بالجامد
 و متراعنيش
 طيب أقولك
 انسيني
 كأني مفيش
 لا عايزة
 خيرك و لا شرك
 سبينني أعيش
 و ارسم فرحي
 جوايا بحرف
 و كلمة في ديواني
 هبروز ضحكتي
 و أقول الفرحة عنواني
 و مين عارف
 إنها من برة
 لكن من جوايا
 متسألنيش و يلة سبينني
 وحياتك
 منا زي الكل
 نفسي أعيش

بتنفس هواك

أنا قلبي شايف
كل حاجة حلوة
فيك
و صوتي لو يسكت
مش هيسكت
عن نداك
و عيوني مهما نزلت
دموعها على ايديك
عمري ما شرق
أو أغرب عن هواك
و الدنيا لو تقفل بيابنها
و ما توصلني ليك
هفضل شمس
حياتك
مش هبعد
عن سماك
و عيونك الحلوة لو
تشك في حبي ليك
عيون قلبي حتى

في كدبك
 مصدقك
 و العمر لو ضيعته
 بين ايديك
 يكفيني لحظة
 أكون فيها
 معاك
 و القلب لو هيصرخ
 باسمك و يناديك
 نبضي يردد
 جوايا صداك
 أوعى تفكر أني
 في يوم هشتاق
 إليك
 ده أنا قلبي كله
 هاجرني
 و عايش معاك
 و روحي
 يا روحي
 من كتر حبي فيك
 حالفة للتنفس
 في كل نبضة

هواك
 حتى عیوني
 بقت تشبه عنك
 لو زاد حیني
 یكفینی ذكری
 عشتها أيام
 رضاك
 أنا قلبي شایف
 كل حاجة حلوة
 فیک
 و صوتي لو یسکت
 مش هیسکت
 عن نذاك

ياعم چاهين

ساعات بسرح
 لوحدى كثير
 و أفكر في
 إلى مشيته
 من مشاوير
 وأشوف الرحلة
 أدامي و أراجع
 جوايا الأسامي
 يا ترى كان
 فيها حد أصيل
 يا ترى كان فيها
 حد جدير ؟
 و الاقي
 الصدمة و الثانية
 و تغمق في عيني
 صورة الدنيا
 و أرجع أبص
 في مرايتي
 الأقي الدنيا

لسا بخير
 مهى مرايتي
 و ده كتابي
 و كراستي
 و ده شعري
 بعيش فيهم
 مع الأساطير
 في دنيا
 كل شئ
 فيها زي قلبي
 جميل
 يا عم چاهين
 دي دنيتهم
 ملانة شر
 و مهوش خير
 لا عارفة أعيش
 على طبيعتي
 و لا انا قابلة للتغيير
 و مضطرة أجاريهم
 و فيها أسير
 أسير مش شايفة ادامي
 و لا عارفة إيه

في الضهر متداري
 لكن قلبي البرئ
 حالف مهما
 في الحياة يصادف
 هيفضل دائما
 مليان خير
 يطير في السما عالي
 لا يوصله بشر
 و لا يبقى لحد أسير
 و مين في الدنيا يطول
 يعيش حر زي الطير
 يا عم چاهين
 أنا قلبي جناح مكسور
 لكن قلبي سليم
 و مش عاجز
 عن التعبير
 و هفضل رغم الكسور
 وردة يفوح
 منها أحلى عبير

